

Bosna i Hercegovina
Federacija Bosne i Hercegovine
FEDERALNO MINISTARSTVO UNUTRAŠNJIH POSLOVA
FEDERALNO MINISTARSTVO UNUTARNJIH POSLOVA
FEDERALNA UPRAVA POLICIJE
SARAJEVO



Bosnia and Herzegovina
Federation of Bosnia and Herzegovina
MINISTRY OF INTERNAL AFFAIRS OF FEDERATION
OF BOSNIA AND HERZEGOVINA
POLICE ADMINISTRATION
SARAJEVO

**PRAVILNIK O NAČINU I RASPOREDU TESTIRANJA KANDIDATA,
SISTEMU BODOVANJA I LJEKARSKOM PREGLEDU U
PROCESU ODABIRA POLICIJSKIH SLUŽBENIKA**

Sarajevo, juli 2025. godine

Na osnovu člana 41., a u vezi sa članom 45. stav (3) Zakona o unutrašnjim poslovima Federacije Bosne i Hercegovine („Službene novine Federacije BiH“, broj: 81/14), člana 67. stav (3), a u vezi sa članom 68. stav (1) Zakona o organizaciji organa uprave u Federaciji Bosne i Hercegovine („Službene novine Federacije BiH“, broj: 35/05) i člana 132., a u vezi sa članom 50. i 51. Zakona o policijskim službenicima Federacije Bosne i Hercegovine („Službene novine Federacije BiH“, br. 27/05, 70/08, 44/11 i 13/18), kao i primjenjujući Standard 7. Politike i procedure Standarda interne kontrole u javnom sektoru u Federaciji Bosne i Hercegovine („Službene novine Federacije BiH“, broj: 75/16), v.d. direktor Federalne uprave policije, d o n o s i

**PRAVILNIK O NAČINU I RASPOREDU TESTIRANJA KANDIDATA,
SISTEMU BODOVANJA I LJEKARSKOM PREGLEDU U
PROCESU ODABIRA POLICIJSKIH SLUŽBENIKA**

**Član 1.
(Predmet)**

Ovim Pravilnikom o načinu i rasporedu testiranja kandidata, sistemu bodovanja i ljebarskom pregledu u procesu odabira policijskih službenika (u daljnjem tekstu: Pravilnik), utvrđuje se način testiranja, program testiranja, nadležnost Komisije za izbor, kao i druga pitanja koja su od značaja za provjeru stručne, radne i druge sposobnosti kandidata u procesu odabira za prijem policijskih službenika u Federalnu upravu policije Federalnog ministarstva unutrašnjih poslova — Federalnog ministarstva unutarnjih poslova (u daljnjem tekstu: Uprava policije).

**Član 2.
(Primjena propisa)**

Procesu testiranja podliježu svi kandidati koji su prijavljeni na javni konkurs, te ispunjavaju opće i posebne uvjete propisane Zakonom o policijskim službenicima Federacije Bosne i Hercegovine (u daljnjem tekstu: Zakon), Pravilnikom o unutrašnjoj organizaciji Federalnog ministarstva unutrašnjih poslova - Federalnog ministarstva unutarnjih poslova, broj: 01-02-2-169/24 od 29.07.2024. godine i drugim podzakonskim aktima.

**Član 3.
(Testiranje)**

Policijski službenik pristupa policijskom organu:

- a) u činu policajca - kao prvi nivo pristupa za kandidate s najmanje završenim IV. stepenom školske spreme;
- b) u činu mlađeg inspektora - kao drugi nivo pristupa za kandidate s najmanje završenim VI. stepenom školske spreme.

**Član 4.
(Rok za testiranje)**

- (1) Provjera stručne i druge sposobnosti kandidata vrši se u zavisnosti od nivoa pristupa u policijski organ u skladu sa članom 42. Zakona.
- (2) Testiranje će se okončati u roku od 120 dana poslije isteka roka za prijavu, te će kandidati koji ispunjavaju opće i posebne uslove i koji su priložili svu traženu dokumentaciju u predviđenom roku i koja je ispravna, imati pravo pristupa testiranju.

Član 5.
(Posebni uvjeti)

- (1) Kandidat pored općih uslova, koji se odnose na prijem u radni odnos policijskih službenika, propisanih članom 46. Zakona, mora ispunjavati i slijedeće posebne uvjete, i to:
 - a) da ima položen vozački ispit „B” kategorije;
 - b) da položi test općeg znanja i pisani rad;
 - c) da ispunjava fizičke sposobnosti;
 - d) da ispunjava psihološke sposobnosti;
 - e) da ispunjava zdravstvene sposobnosti.
- (2) Kandidati se testiraju po slijedećem redoslijedu:
 - a) test općeg znanja, uključujući i pisani rad-esej;
 - b) test fizičke sposobnosti;
 - c) intervju
 - d) ljebarski pregled;
 - e) psihološki pregled, uključujući test i razgovor;
 - f) drugi test koji policijski organ smatra potrebnim i opravdanim.
- (3) Kandidat koji ne prođe jedan od testova iz stava (2) ovog člana izuzev tačke c) isključuje se iz daljnjeg postupka odabira.

Član 6.
(Komisija za izbor)

- (1) Komisiju za izbor (u daljem tekstu: Komisija) Rješenjem imenuje direktor Uprave policije.
- (2) Komisija je sastavljena od:
 - a) tri policijska službenika sa činom samostalnog inspektora i više, koje postavlja direktor Uprave policije;
 - b) dva državna službenika zaposlena u Federalnom ministarstvu unutrašnjih poslova — Federalnom ministarstvu unutarnjih poslova (u daljnjem tekstu: Federalno ministarstvo), koji imaju najmanje službeno zvanje stručnog savjetnika, koje postavlja ministar Federalnog ministarstva.
- (3) Komisijom predsjedava policijski službenik s najvišim činom ili sa najdužim stažom u izjednačenim činovima.
- (4) Komisija sve odluke usvaja većinom glasova svih članova. Komisija na svojoj prvoj sjednici donosi poslovnik o radu, dok o radu Komisije i odlučivanju vodi se zapisnik koji je sastavni dio spisa predmeta.

Član 7.
(Nadležnost Komisije)

Zadatak Komisije je da:

- a) utvrđuje sadržaj testova iz člana 5. stav (2) ovog Pravilnika, uz odobrenje direktora Uprave policije;
- b) utvrđuje konačni rezultat za svakog kandidata na osnovu ukupnog zbira rezultata svakog od testova;
- c) izdaje listu kandidata koji su pristupili testiranju;
- d) predlaže kandidate koji imaju najveći broj bodova sa liste iz tačke c) ovog člana, radi upošljavanja u skladu sa brojem oglašanih slobodnih radnih mjesta, poštujući odredbe iz člana 11. Zakona o unutrašnjim poslovima Federacije Bosne i Hercegovine.

Član 8.
(Kriteriji za utvrđivanje sposobnosti kandidata)

Metodu, način i sistem bodovanja testiranja kandidata, provjera fizičke sposobnosti i postupak utvrđivanja posebne zdravstvene sposobnosti kandidata utvrđuje se aktom rukovodioca policijskog organa.

Član 9.
(Ljekarski pregled)

Potvrdu zdravstvene sposobnosti priložit će kandidati koji se nalaze na predloženim listama kandidata po uspješnosti i isti snose troškove ljekarskog pregleda.

Član 10.
(Eliminacioni prag)

- (1) Eliminacioni prag predstavlja onaj broj bodova koji je dovoljan za uspjeh kandidata na testu.
- (2) Eliminacioni prag određuje se prema nivou pristupa kako je to određeno u članu 3. ovog Pravilnika:
 - a) za I nivo u čin policajca — završen IV stepen školske spreme eliminacioni prag iznosi minimum 65% tačnih odgovora, odnosno pokazanog znanja na testu općeg znanja uključujući i pisani rad i testove fizičke sposobnosti;
 - b) za II nivo u čin mlađeg inspektora — završen VI stepen školske spreme eliminacioni prag iznosi minimum 65% tačnih odgovora, odnosno pokazanog znanja na testu općeg znanja uključujući i pisani rad i testove fizičke sposobnosti.
- (3) Kandidati koji nisu postigli eliminacioni prag (prolaznost na testu) eliminišu se iz daljnjeg procesa odabira.

Član 11.
(Održavanje reda prilikom testiranja)

- (1) Prilikom rješavanja testa kandidatu nije dozvoljeno korištenje bilo kakvih materijala ili elektronskih uređaja.
- (2) Predsjedavajući i članovi Komisije dužni su se starati o redu prilikom provođenja testiranja.
- (3) Komisija može isključiti iz daljnjeg postupka i kandidata koji se ne pridržava uputa o redu prilikom testiranja i svojim ponašanjem ometa postupak testiranja ili koji prilikom testiranja koristi nedozvoljena sredstva, odnosno prepisuje ili zatraži odgovore od drugog kandidata ili koji učini dostupnim odgovore drugom kandidatu.
- (4) Predsjedavajući i članovi Komisije mogu pojasniti kandidatima sadržaj pojedinih pitanja iz testa, s tim što ne smiju dati ili sugerisati tačan odgovor.

Član 12.
(Pisani test)

- (1) Komisija priprema test općeg znanja, najranije 24 sata prije započinjanja testiranja, koji se pohranjuje u zatvorene i zapečaćene koverte, a pripremit će se i dodatno testiranje za kandidate koji budu imali isti broj bodova i koji se nalaze u kategoriji kandidata za prijem i popunu upražnjenih radnih mjesta.
- (2) Provjera općeg znanja vršit će se kroz poseban pisani test koji ima 25 pitanja, za koje je ponuđeno više odgovora od kojih je samo jedan tačan, te pisanje pisanog rada na zadanu temu, u kojem kandidat obrađuje zadanu temu iz oblasti sigurnosti.

Član 13.
(Obavješćavanje)

- (1) Nakon završenog testiranja nadležna Komisija, ustanovljena odredbama člana 48. Zakona pristupa ocjenjivanju testova i rezultata, objavljuje ih na web stranici Uprave policije i na oglasnoj ploči organa, te tako obavještava kandidate o rezultatima koje su postigli.
- (2) U skladu sa Zakonom o zaštiti ličnih podataka („Službeni glasnik BiH“, br. 12/25), Lista kandidata su objavljene pod šiframa.

Član 14.
(Ocjenjivanje stručnog testa)

Ocjenjivanje kandidata provodi Komisija na način kako je propisano Zakonom, ovim Pravilnikom i važećim Kriterijima o metodi, načinu, sistemu bodovanja, testiranja kandidata, provjera fizičke sposobnosti i utvrđivanja posebne zdravstvene sposobnosti kandidata.

Član 15.
(Žalba na odluku Komisije)

- (1) U roku od osam (8) dana od dana objavljivanja lista, svaki kandidat može podnijeti žalbu Policijskom odboru za policijske službenike Federacije Bosne i Hercegovine.
- (2) Žalba se podnosi na listu prihvaćenih, odnosno neprihvaćenih kandidata i na konačne rezultate svih kandidata koji su pristupili testovima i uspješno završili testiranje.

Član 16.
(Prestanak važenja ranijeg propisa)

Stupanjem na snagu ovog Pravilnika prestaje da važi Pravilnik o načinu i rasporedu testiranja kandidata i sistemu bodovanja u procesu odabira policijskih službenika, broj: 09-882 od 11.08.2016. godine i broj: 11-11/4-02-2-973 od 17.09.2024. godine.

Član 17.
(Stupanje na snagu pravilnika)

Ovaj Pravilnik stupa na snagu narednog dana od dana donošenja i neće se objavljivati u „Službenim novinama Federacije BiH“.

Broj: 11-11/4-02-2-830
Datum: 25.07.2025. godine

V.D. DIREKTOR
(Načelnik SKP-a)
GLAVNI INSPEKTOR
Vahidin Munjić

